

Na osnovu člana 108. Zakona o odgoju i obrazovanju u osnovnoj i srednjoj školi Kantona Sarajevo („Službene novine Kantona Sarajevo“, broj 27/24), člana 109. Pravila Javne ustanove Osnovna škola „Hilmi ef. Šarić“ Tarčin, Sarajevo, te člana 57. Zakona o zaštiti ličnih podataka Bosne i Hercegovine („Službeni glasnik BiH“, broj: 12/25), Školski odbor JU OŠ „Hilmi ef. Šarić“ Tarčin, Sarajevo, na 43. sjednici održanoj dana 04.11.2025. godine, donosi:

PRAVILNIK

O VIDEONADZORNOM SISTEMU U JU OŠ „HILMI EF. ŠARIĆ“, TARČIN, SARAJEVO

Član 1.

(Pravni osnov i svrha)

Ovim Pravilnikom uređuje se postojanje, način funkcionisanja i usklađivanje sistema videonadzora u JU OŠ „Hilmi ef. Šarić“ Tarčin, Sarajevo sa odredbama važećih zakona i propisa.

Videonadzor se koristi isključivo radi zaštite lica (učenika, radnika i posjetilaca) i imovine škole; sprečavanja neovlaštenog pristupa te osiguranja sigurnosti školskog prostora. Svaka druga svrha obrade nije dozvoljena bez posebne zakonske osnove.

Član 2.

(Sistem videonadzora)

Sistem videonadzora sastoji se od unutrašnjih i vanjskih kamera, monitora te uređaja za prenos, snimanje, obradu i pohranu vizuelnog zapisa.

Kamere su digitalne i snimaju isključivo sliku, bez zvučnog zapisa.

Videonadzor se vrši:

- praćenjem događaja u realnom vremenu i/ili
- snimanjem i pohranjivanjem vizuelnog zapisa u memoriju digitalnog snimača sa mogućnošću naknadnog pregleda.

Član 3.

(Pokrivenost i lokacije kamera)

Videonadzor obuhvata:

- unutrašnje prostore škole (hodnike, ulaze, zajedničke prostorije),
- vanjske površine škole (školsko dvorište, školski vrt, ulaze u školu i nužne izlaze).

Videonadzor ne smije obuhvatati učionice, kabinete, toalete, svlačionice, prostorije za odmor i druge prostore u kojima se opravdano očekuje privatnost.

Član 4.

(Način obrade i čuvanje snimaka)

Snimanje se vrši pomoću digitalnih kamera koje snimaju isključivo sliku, bez zvuka. Snimljeni materijal pohranjuje se na zaštićenom serveru u prostorijama škole, pod fizičkim i tehničkim nadzorom ovlaštenih osoba. Snimci se čuvaju najduže 30 (trideset) dana, osim u slučajevima kada je njihovo zadržavanje neophodno zbog istrage ili kao dokaz u postupku pred nadležnim organima. Po isteku roka, snimci se automatski brišu.

Član 5.

(Ovlaštenja, odgovornost i evidentiranje pristupa)

1. Pristup pohranjenim snimcima ima isključivo direktor škole ili lice koje direktor ovlasti posebnim aktom.
2. Pristup snimcima dozvoljen je isključivo u svrhe utvrđene ovim Prvilnikom, a svaki pristup mora biti evidentiran u zapisniku.
3. Zabranjeno je kopiranje, neovlašteno korištenje ili distribucija snimaka.
4. Škola vodi evidenciju o pristupu sistemu videonadzora, koja sadrži datum, vrijeme i ime lica koje je izvršilo uvid.
5. Snimci se mogu izvoziti ili ustupati samo na osnovu pismenog odobrenja direktora škole, odnosno na zahtjev nadležnih organa u skladu sa zakonom.
6. Kontrolor obrade ličnih podataka putem videonadzora je direktor škole, koji je odgovoran za zakonitu upotrebu, čuvanje i zaštitu prikupljenih podataka.
7. Direktor može ovlastiti stručno lice škole za tehničko održavanje sistema, bez prava pristupa snimcima, osim po posebnom pisanom nalogu.

Član 6.

(Obavještenje o videonadzoru)

Na ulazu u prostor pod videonadzorom mora biti vidno istaknuto obavještenje:

OBJEKAT JE POD VIDEONADZOROM

Obavještenje sadrži kontakt telefon preko kojeg se mogu dobiti opće informacije o videonadzoru.

Obavještenje mora biti postavljeno najkasnije prilikom ulaska u vidokrug kamera.

Član 7.

(Prava nosilaca podataka)

Lica čiji su podaci obuhvaćeni sistemom videonadzora (učenici, roditelji/staratelji, uposlenici i



posjetioci škole) imaju prava u skladu sa Zakonom o zaštiti ličnih podataka Bosne i Hercegovine.

Ta prava obuhvataju pravo na informaciju o obradi podataka koji se na njih odnose, kao i pravo na ispravku, brisanje ili ograničenje obrade ako se smatra da je obrada izvršena suprotno zakonu.

Zahtjevi se podnose isključivo u pisanom obliku direktoru škole, uz obaveznu identifikaciju podnosioca zahtjeva.

Član 8.

(Mjere zaštite i odgovornost)

Škola je dužna osigurati tehničke i organizacione mjere zaštite sistema videonadzora od neovlaštenog pristupa, izmjene ili brisanja podataka.

Sistem mora biti zaštićen lozinkom, a pristup omogućen isključivo ovlaštenim osobama.

Održavanje i servisiranje sistema vrši ovlaštena firma na osnovu ugovora koji garantuje povjerljivost i zabranu kopiranja snimaka.

Neovlašteno korištenje, umnožavanje ili distribucija videozapisa predstavlja težu povredu službene dužnosti i može imati krivičnopravne posljedice.

Član 9.

(Usklađivanje i objava)

Ovaj Pravilnik donosi se radi potvrđivanja postojećeg sistema videonadzora i njegovog usklađivanja sa važećim propisima iz oblasti zaštite ličnih podataka.

Pravilnik se objavljuje na oglasnoj tabli i web stranici škole i stupa na snagu danom donošenja.

Član 10.

(Završna odredba)

Danom stupanja na snagu ovog Pravilnika, prestaje da važi Pravilnik o videonadzornom sistemu JU Osnovne škole „Hilmi ef. Šarić“, Tarčin, Sarajevo, broj: 83/17 od 16.02.2017. godine.

Broj: 01-1-654/2025

Datum: 04.11.2025. godine



Predsjednik Školskog odbora

Ešref Bajrektarević

Bosna i Hercegovina
Federacija Bosne i Hercegovine
Kanton Sarajevo
Općina Hadžići
Osnovna škola „Hilmi ef. Šarić“ Tarčin



Bosnia and Herzegovina
Federation of Bosnia and Herzegovina
Canton Sarajevo
Municipality of Hadžići
Primary school „Hilmi ef. Šarić“ Tarčin

Broj : 01-1-654-2/2025

Datum : 04.11.2025.godine

Na osnovu člana 108. Zakona o odgoju i obrazovanju u osnovnoj i srednjoj školi u Kantonu Sarajevo („Službene novine Kantona Sarajevo” broj: 27/24), člana 57. Zakona o zaštiti ličnih podataka Bosne i Hercegovine („Službeni glasnik BiH“, broj: 12/25), člana 109. Pravila JU Osnovna škola „Hilmi ef. Šarić“ Tarčin, Sarajevo, broj : 01-1-199/25 od 04.04.2025. godine, na osnovu prijedloga direktora škole, Školski odbor na 43. sjednici, održanoj dana 04.11.2025. godine jednoglasno donosi :

ODLUKU

o usvajanju Pravilnika o videonadzornom sistemu JU Osnovna škola “Hilmi ef. Šarić” Tarčin, Sarajevo

I

Usvaja se Pravilnik o videonadzornom sistemu JU Osnovna škola “Hilmi ef. Šarić” Tarčin, Sarajevo.

II

Usvojeni tekst Pravilnika o videonadzornom sistemu JU Osnovna škola “Hilmi ef. Šarić” Tarčin, Sarajevo, sastavni je dio ove odluke.

III

Ovaj Pravilnik o videonadzornom sistemu JU Osnovna škola “Hilmi ef. Šarić” Tarčin, Sarajevo stupa na snagu danom donošenja.

IV

Danom stupanja na snagu ove Odluke prestaje da važi Pravilnik o videonadzornom sistemu JU OŠ „Hilmi ef. Šarić“ Tarčin, Sarajevo, broj: 83/17 od 16.02. 2017. godine .

PREDSJEDNIK ŠKOLSKOG ODBORA



Ešref Bajrektarević

Dotaviti :

1. Oglasna ploča ;
2. Sindikalna podružnica škole ;
3. a/a